

OMUKWETU

Registered at the General Post Office as a Newspaper

10c

Kalunga oku li ano peni?

KALUNGA A HOLAMA

Etumbulo ndika Kalunga a holama nenge omuholekwa otali monika nawa melongo lyuukriste. Miitya mbika otamu holoka nawa kutya kape na ondjila yilwe omuntu a adhe kuye mwene, a mone oondunge dhe kaaku shi muJesus Kristus, aawe.

Pethimbo lyetu moshigwana omu na aantu taa dhiladhila, kutya Kalunga okwa holama. Sho taya mono omaudhigu gi ili nogi ili moshigwana, oshoka ngiika a holama.

Ndele pokati kaantu mbano nelongo lyuukriste ope na eyooloko. Melongo lyuukriste otamu tiwa okwa holama, ihe ota monika muKristus mokumwiitaala. Hangashi hatu ti, Kalunga okwa holama sho pe na shontumba nenge shongandi oshidhigu.

Ngele tatu humu komeho mokulesha, elongo lyuukriste otatu adha taku tiwa:

"Kalunga ti iholola ye mwene".

- 1) Miishitwa, Eps. 19:2.
- 2) Mokukala kwaatu noku ya enditha, 1 Mos. 5:20.
- 3) Mehistoli lyiigwana, 2 Mos. 1;13-22.

Mpaka otapa monika nawa kutya nani Kalunga ina holama ngaashi omuntu ta dhiladhila. Kalunga oku li popepi pungoye. Jesus ta ti:

"Oshilongo shaKalunga oshi li meni moomwedheni".

Tala kep. 2



Oshilonga shetumo noshevangeli ohatu shi longo ngahelipi mefimbo eli loukoloni tau xulu, oukulo tau ingidwa nounyuni aushe?

Ohatu udifa ngahelipi efindano laKristus mefimbo lomalinyengo e fike apa, omo o-vaitaveli tava teya eehombo, tave lime-nghulifa, tava kolwa, tava shuna monima, tava i oondalashipotava voo tava kukuma eendjovo daKalunga?

P. Heita.

Ehokololo alishe tala kepandja 6

Kalunga oku li ano peni?

Dha za kep. 1

Momahistoli giigwana otatu dhimbulula nawa omaihololo gaKalunga puuyelee, lil. 17: 26-30. Moovelise ndhika omwa kwatelelwa omaudhigu goludhi kehe moshigwana. Moka-mbo kopeke omu na amatubulo taga ti:

"Shoka she ku adha, osha adha ndje tango".

Otu na ano eihololo ndyoka tatu li mono mu-Jesus Kristus mOmbimbeli, lya gwanena eitaalo lyetu noku tu taagulukitha omulonga guudhigu tu ye megulu. Twa pitila meitaalo lyomuJesus Kristus, pwaa na iilonga yuuyuki tu yi longe andola.

Ombimbeli otayi popi ya koleka sho ta yi ti: "Omuyuuki oha kala e na omwenye gwomeitaalo" Rom. 1:17.

Nando Ombimbeli oyo embo lya nyolwa kaantu. otwa pewa ngaa omukumo kutya oya nyolithwa koonkondo dhOmbepo Ondjapuki yaKalunga.

Omwiitaali gwopethimbo lyongashingeyi lyomainyengo omahaluthi, ota kwata kegonga eyapuki lyongenge mbali nokutya evangeli lyombili moohapu dhaKalunga, 2Tim.3:16-17b.

Mehistoli lyOngeleka otamu holoka iiningwanima iitilithi noya li ya fa ya ninagula oshigwana shaKalunga, pethimbo ndiyaka Kalunga a fa a holama. Ihe okwe ya ngaa koshigwana she ti iholola kusho ngaashi kAaisrael ya zi muupongekwa womimvo odhindjindhindji; ngaashi muNdowishilanda pethimbo lyaHitler. Ethimbo ndika lyomakuyunguto gomaludhi gi ili nogi ili, otu na okukala twa dhigupalekwa kohapu yOmbimbeli.

Twa pita koohapu dhaKalunga hakoohapu dhuuyuni aawe. Omuye tamu zi oonkondo dhomwiitaali kehe, Jes. 6:20.

MOmbimbeli tatu adha mo pahapu yomelongo lyuukriste. Ombimbeli oyo tayi holola nawa eshito lyaKalunga notayi tu pe iinima ine.

- Kalunga ekota yiinima ayihe.
- liningwa ayihe oyi na oshilonga shontumba nenge shongandi.
- Kalunga okwa shita sho opala onkee uuwinyi inau za muye, 1 Mos. 1:25b.

d) Kalunga a shita ayihe noohapu dhe. Shoka a hala osho shi na okuningwa.

Onkee tu na okutya ngaashi "Ependafule lyokuWittenburg" ndyoka lyi imbi tali ti:

Kalunga ota wilike ayihe

Shigwana shandje. Kalunga oye omunamwenyo, ta wilike ayihe naayihe yi li po omolwe nonkalamwenyo yetu wo ayihe oyi li miikaha ye. "Oshoka omiikaha yandje nde ku negel". Otwa negelwa miikaha yi na elago oshoka ota wilike nuuyuuki nuuyapuki nohole yaa na ongamba. Mewiliko ndika ohamu pangelwa kuuyuuki nokuuyapuki we.

Eholamo neihololo lye, newiliko lye ayihe ota-yi pangelwa kuuyuuki nuuyapuki we apehe nomuNamibia wo. Meihololo lye ote tu lombwele ta ti:

Moshilando ngele omu na aayuuki 20 otandi shi sile ohenda, 1 Mos. 18:3b.

W. H. K. Ashipala

UHA PANDULA INGA NOVAKE

Onda hala okupandula oyoongalele ivali ya li ya ongala mEngela neudo. Eshi ya kala pufye, oye tu kwafa mokulonga oshilonga shoudiakoni movakambelindunge vetu.

Oshoongaleleleka osha yandja R21,20
Oshoongalele shexungomwenyo R13,28

Kalunga na punike omake aavo va li va longi oshilongayakulo. Ye e va longife vali nokomesho.

*Omukweni
Kristofina Ndatyomawe*



Omusitagongalo nomulongi gwaasita mOngeleka yetu, Elia Niinkoti

OMUNTU KOSHIPALA SHOMUNTU NOSHAKALUNGA

Omuntu ye mwene oku li po a kitakana no ita vulu okuuviwa ko ombiliha. Jesus ota holola ehala momuntu molwombepo ye nuunkundi momuntu molwonyama ye mekwata-thano nokulonga uuwanawa. Ombepo nonyama momuntu iinima tayi kondjithathana.

Martin Luther ota ti kutya omuntu oku li omuyuuki nomulunde pethimbo limwe. Reihold Niebur ota holola kutya momuntu omu na uuwanawa nosho wo uuwinayi. Omukulu gwonale ota ti omuntu iha ye le a fa ei. Kolutya omuntu pethimbo a talika a yela opo wo pethimbo ta monika iiso.

Ihoholelwa ayihe mbika otayi ulike kutya omuntu kombinga ota ziminwa kombinga ota tindwa. Omuntu oye ano *iyaloo kumwe naawe*.

Aantu olwindji mokukala nooyakwawo inaa tonatela oshili (reality) ndjika, onkee ekwata-thano lyomuntu nomuntu omukwawo oye e-ndekela kombinga yimwe aluhe. Olya tungila komadhiladhilo gi ilyata okandondi.

Omuntu aguhe aluhe oku li po sha, sha hokiwa nasha, inaashi hokiwa. Omuntu ngele ta pangelwa kohokwe okuhokwa mukwawo, ote shi ningithwa kuuwanawa mboka tau holoka munakuhokiwa nomadhiladhlo ganakuhokwa, otaga tengele owala muuwanawa wanakuho-kiwa noga posipalela uuwinayi we.

Ngoka ta pangelwa kuutondwe okutonda mukwawo, omadhiladhilo ge otaga tengele owala muuwinayi wanakutondwa noga posipalela uuwanawa we. Mpaka otashi holoka aluhe kutya omuntu koshipala shomuntu mukwawo oku li ko aluhe etata lyowala.

Omukulugwonale ote shi holola nawa shota ti kutya monkalathano omu na "Ngu ta ti, sa, ngu ta ti kala ko".

Omuhaletiso ota pangelwa kuuwinayi womuntu ngo nomuhalelimwenyo ota pangelwa kuuwanawa womuntu oye tuu ngoka gumwe.

Omuntu olwindji mokukala nayakwawo oku li po omuyambeki gwaamboka a hokwa nomuthingi gwaamboka inaa hokwa. Iinima mbika omuntu oku na oku yi kotokela, oshoka ota nyengwa oku shi ninga nuuyuuki wa gwana po.

Kalunga mokutala omuntu ihe mu topola pokati, onkee Kalunga iha longitha ohokwe nuutondwe mokukala nomuntu. Omuntu koshipala shaKalunga oku li ko a gwana po, omwanawawinayi. Kalunga okwe mu taamba nomwenyo aguhe e li ngaaka.

Kalunga oye mwene oKalunga kuuwanawa kee shi Kalunga kuuwinayi. Ihe katu vulu tu dhiladhile kutya Kalunga, oKalunga ha gamuka aawinayi eta gama kaawanawa. Aawe.

Uuwinayi nuuwanawa womuntu, hawo tau utha ekwatathano pokati kaKalunga nomuntu, ihe ehala nelalakano lyaKalunga okuhupitha omuntu oyo tayi utha ekwatathano ndyoka.

Omuntu ngele omuwanawa, Kalunga oku uvite ombili nomuntu ngele omwinayi Kalunga ita thingi, ihe ota tameke iilonga nee. Muhanwanawahamwinayi mono, Kalunga ota tameke okuhohela uuwanawa u lunde uuwinayi.

Mbuka owo uukwatya woshilongahupitho shaKalunga momuntu. Aantu oyendji ngele ya gwile muuwinayi noya honipalekwa kiilonga yawo, ohaa dhiladhila Kalunga e ya tonda.

Haa dhiladhilile Kalunga oshinima shoka ihaa ningi nande, oshoka Kalunga ohole. Ohole yaKalunga oyi thike pamwe komuyuuki nomulunde. Kalunga omuntu kehe ote mu longele ohole. Ota eta eyambeko mpoka pwaa na sha.

Ota eta uukolele mpoka pena uunkundi. Kohole Ye ota sile ohenda omuyoni. Nohole, Kalunga ota kwatha nota tungu. Nohole Ye ota sindi uuwinayi kuuwanawa.

Kalunga mokutala omuntu iha longitha ohokwe, oshoka ohokwe ohayi pangelwa kuuwanawa waashoka sha hokiwa nohayi longo owala uuna uuwanawa mboka u li po. Manga ohole ya thikama komagulu gaali, ohokwe oya thikama kokugulu kumwe notayi vulu okwaadha kokule uuna tayi yambidhidhwa kohole. Pwaa na ohole, ohokwe kayi shi sha.

Omwenyo gwongeleka ogwo ohole yaKalunga. Ongeleka ihayi longitha uutondwe oshoka muoyo omo tamu longelwa ehupitho lyomuntu kehe.

Tala kep. 8



Katu na fiku natu maneni po oupyakadi mokati ketu ngenge ohatu nyamukula owii nowii mukwao. Natu kale tu hole ovamwameme, nava kale otave tu ningile owii u fike peni. Dimbulukweni eendjovo dOmwenye wetu Jesus eshi a tile: "Hala omunaita naave." Mwaashi omo tu na okukala, outondwe natu u shakeneke nohole.

Eshi osho sha kala omukanghaitavelo womukondjelimanguluko nomukondjelibili pokati komihoko, muAmerika, omushamane Martin Luther King Jr.

Tula aagundjuka momukanka gwepukululo lya yela

Eputudho otali ningwa sho omuntu ta koko mokuuva ko, momaiuvito nomeihumbato mowaadha elalakano lye. Olyo tali kwathele omuntu mpoka e li po noku mu kwatha a hume komeho ngashi tashi vulika.

Eilongo olyo oshitsa shopokati sheputudho. Mowaadha elalakano lyepatudho omuputudhi oku na okutseya nokulongitha oondjila (omikalo) dhi li mondjila, dha longekidhwa opo a adhe elalakano lye.



Omutaleli gwelongo lyopakriste moosikola dhoshigwana, omusitagongalo Hosea Nampala, ye li moonkundathana nomutaleli gwelongo Abraham Njambali.

linima yimwe omuputudhi nomutekuli kehe ta pumbwa oku yi tseya:

1. Onkalamwenyo yomuputudhwa.
2. Omudhingoloko moka e li, ogwa tya ngiini? (Egumbo, aashiinda, omukunda noshotuu).
3. Ogwepipi lini?
Ongeleka mukuputudhila iilyo yayo muukriste oyi na elalakano ndika:-
 - (a) Okutseya Kalunga ngoka a hololwa mu-Jesus Kristus, ya kale mekwatathano naye noya tsakanithe oshinakugwanithwa shawo kooyakwawo nokuuyuni.
 - (b) Ya nwe uugumbo mOngeleka moka taa hempulula Kalunga katatugumwe, moku mu longela, moohapu nomiilonga nokuyakula ngaaleligumbo ye shi kwiinekelwa megumbo, megongalo nomoshigwana.
 - (c) Ye ende muuyeleele koshipala shaKalunga noya koke momadhiladhilo; ya ninge omatokolo yoyene noya kale kuyo yene.

Melandulathano lyetu koho yepatudho lyopakriste okwa tulwa gamwe gomomaputudhilo guukriste momagongalo getu:

1. *Owandaha momagumbo: Egumbo olyo eha lyotango moka eputudho lyopakriste li na okutameka. Owandaha yomegumbo otayi ningi egumbo eha lyelongelokalunga.*

Elandulathano lyowandaha olwindji olyo ngaa eimbilo, okulesha otekisti yesiku negalikano. Aanona oye hole owandaha ngaashi aakuluntu wo, ashike olwindji omukalo gwowandaha ogu li pashikuluntu naanona pamwe taa landula nuudhigu. Molwomukalo ngoka, aanona yamwe ya tondo nokuli oowandaha.

2. *Osikola yOsoondaha: Aanona otaa longwa naanaa pamuthika gwokuuvako kwawo. Otaa landula nawa ehokololo shi vulithe okulandula euvitho nando otekisti oyo ngaa yimwe; otaa hokwa wo olwiimbo.*

3. *Oongundu dhomomagongalo: Elalakano lyoongundu dhaamati naakadhonagongalo o-lyokwiithana aanona ya koke mondjila yOmuwa. Ihe moongundu ndhika otaa longwa wo iinima yi ili ngaashi: uunkulungu wiikaha, o-maudhano nomayakulo gi ili, gokuyakula e-gongalo.*

Oongundu ndhika otadhi pumbwa aawiliki ya putudhilwa ewiliko lyawo. Elalakano lyoongundu ndhika otali kana ngele tayi shituka okagongi kuudhano ngaashi yamwe taye ka ithana.

Eshasho: Ngele taku popiwa eshasho ongeputudho lyomukriste, otatu dhilaadhila olwindji apagani. Meshasho lyaakuluntu otaku dhi-



Omusitagongalo Abisalom Hasheela, ngoka a hogololwa numvo kokomitiye yEhangano lyoongeleka oonkwaevangeli pa-Luther muumbugantu waAfrika (FELKSA) a ninge oshilyo shEwilikongundu lyEhangano ndika meputudho lyopakriste mdhina lya ELOK. Tate Hasheela okwa kala omimvo dha zi ko omulongi gwaasitagongalo kOtjimbingwe.

gininwa Okatekisa ka tseyike momutse shi vulithe okuuva ko esilohenda lyeshasho lyolyene.

Ekoleko: Omaputudhilo agehe ga tetekele otaga thindile aalongwa mekoleko. Aagundjuka ya shashelwa peke naambo ya piti mosikola yeshasho otaa yi mekoleko.

Mekoleko omuntu oti ilongo okuuvako iinima yomeitaalo lyakriste moka shashelwa mo. Okuuva ko ohole yaJesus moshilonga shekulilo komuntu mwene, oku na oshilonga ku vule uunongo womomutse.

Mpaka otatu dhimbulula eputudho lyopakriste kutya olyo elyenge lya kwatathana. Elyenge ndyoka ngele itali tokolwa kiinima yimwe twe yi tumbula metetekelo, nena kekatho lyOmbepo yaKalunga eputudho lyopakriste otali adha elalakano lyalyo.

Olye omuputudhi?

Miilongaputudho ayihe twe yi popi metetekele tavi ningwa momagongalo omuputudhi oye ngaa elelogongalo. Olyo lyi inekelelwa oshilonga shika kuKalunga mwene.

Hilma Mpingana Shilongo

AALONGWA OYA PUMBWA EKWATHO

Aanona yatano yomaanona 30 aandjolowele itaya yi nawa miinima yosikola, onkee oya pumbwa ekwatho lyomeendelelo. Pamwe omumoye ogumwe gwawo?

Epulo ndika oli ipulwa sho pe na aanona oyendji ye na uudhigu moku ilonga nonando oye thike puyakwawo momagano nenge oye vule po nokuli.

GANDJA OLUPANDU KOMUNONA

Aakuluntu oye na okundhindhilika ompumbwe yokupandula omunona peha lyokudhina shoka sha ningwa komunona nando oshishona. Omunona ngoka ina ninga nawa olwindji okwa undulilwa hwiya, pwaana we egwedheloko lyasha.

Omunona omunandunge ngoka inaa ninga nawa miilonga ye, ota vundakana po opo ihe mpaka ekwatho tali pumbiwa.

Omaudhigu gokwiilonga ohaga zi mombepo, monyama nomomudhingoloko.

Aakuluntu oye na okutaamba aanona yawo ngaashi ya shitwa. Ngele ishewe ope na ekwatho lyontumba nalyo nali taambwe ko, oshoka olyo li li po.

Moondjugo dhoosikola aalongi oye na okukala ye shi aalongwa yawo osho wo muuyuni moka ye li mo. Naku takamithwe kutya

omunona kehe ota makele esiku kehe uuto-toye welongo nokuuva wo kutya okwa taambwa.

Efolo Glenda Hicks omulongi mosikola yokukwatha mpoka aalongwa ya nyengwa (remedial), mokolindji yomuJohannesburg, ngoka a ningi ekumagidho ndika okwa tsikile ko ishewe ta ti.

Omakonakono gopalongo lyuukilila (formal) naandyoka inali ukilila (informal) ngoka taga ulike shoka sha pumbiwa okulongululwa oga pumbiwa noonkondo.

(The Star)

OU TO KOFA PENDUKA

Ovakriste vakwetu, mefimbo eli li djuu nola pupyala. djaleni oiti yaKalunga, opo mu dule okufikamena ekonda lomulundili. Mokukondja natu kale oupafi nokwiindila.

Ndele komesho yaashishe, tu djaleni oshikelelifo sheitavelo. Mu eshi ohatu dulu okufinda oikuti oyo ya xwama, yomutondi.

Tu kondjeni hano twa taalela Kristus.

Atty-L. P. Ka Haininga



Eputudho lyopakriste megongalo nomoshi-gwana oli na omidhi dhalyo monkalathano yomegumbo sho tavi kala ya tonate-lwa nawa muukumwe watate nameme.

Manga nda li muSoomi, onda pulwa epulo eli: Okuninga omutumwa mefimbo eli (1970-1980), otashi ti ngahelipi? Eshi osha etela nge ekonakono loshilonga shetumo. Unene tuu omutumwa momido edi domalunduluko. Oshinima shotete tashi dimbulukiwa okutameka omudo 60, osho omalunduluko moiwana, momapangelo nomonghalafano.

Ohandi dulu oku shi popya nda yukilila, kuty ehistoli loukoloni ola xula po ngaashi tu shi wete poushiinda wetu muAngola shitalala. Naau ta anyene oukoloni okwa fa ashike omunhu ta anyene oshikutu sha kulupa, yee ta pewa shipe.

Epulo paife otali yukilile Ongeleka: Mefimbo eli tali lunduluka Ongeleka otai kala ngahelipi? Oilonga yOngeleka otai ka enda ngahelipi?

Ongeleka yovene kai na omalalakano mahapu. Elalakano layo okuwanifa ehala laKalunga (Mat.6:10). Nomefimbo eli lelunduluko nolo-mandundumo, konima yOngeleka oku na oshipango shajesus shetumo Mat. 28:16-20.

Oshipango eshi osho okushiivifa etumwala-ka lehupifo fiyo okeengaba dedu. Paife eshi ongovakriste novaitaveli otu na omutengi komapepe etu oo hatu pumbwa oku u wanifa, oku tandavelifa Ouhamba waKalunga. Ove omukriste ou na oshinakuwanifwa we shi pewa kuKalunga.

Oshinakuwanifwa eshi oshi li sha yukilila omuntu ove mwene koshito. Otashi pula eifano, elyuudo lomeni, kutya naame ondi na sha okuwanifa meni leengamba deshito laKalunga. Ombibeli oye ya tu litale oshipala noshipala naKalunga meendjovo daye.

Momido 70- odo da ehenifa exulepo lomido 1900 ko kutamekwe omido deyuvi lipe omo Kalunga ta lombwele ovanhu vaye ta ti:

"Otamu ka ninga ovahokololi vange" Oil.1:1-8. Mefimbo loukoloni wa xula po ile mefimbo lemanguluko. Mefimbo loukulo tau ingidwa nounyuni aushie. Tashi ti okuninga omutumwa mefimbo eli okuhokolola, okuudifa, okwiingida efindano laKristus. Neshito otali pulwa li wanife oshinakuwanifwa eshi Ps.19:1-5.

Mehistoli lounyuni ohatu hange mo ehistoli laKalunga. Patete Kalunga okwa shita eulu nedu." Mehistoli alishe okutameka kodula yotete yekaleko lounyuni, oKalunga ta hokololwa. Ndishii ngenge hatu kendabala okwaaluka ohatu fiki ashike moukwaalushe. Sha hala okutya; eshito laKalunga ola tamekwa noukwaalushe notali xulile moukwaalushe natango.

Manga nee oitamekifitungifi ei inai xwaxunuka Kol.2:8, ewi laKalunga otali tu ingida ava tu lyeni meni leedula 1970 tu tamekeni oshilonga shetumo.

Ohatu ka tala ngehe shi na okuwanifwa, nolupe leedula edi ngehe la tya. Halo lwote-te oshilongatumo, ndele namo ewi otali udika linene. Olyelye a hala okupwilikina ke-wi eli?

Shaashi ovanhu ove na omapulo nominalipulo momitima yavo. Okuniwe yo omaudjuu, nomaudjuu aa oku li ko a dja momunhu, a etwa komunhu noo oku li po omolwovanhu.

Mokati komaudjuu oo tae linyenge mokati kovaitaveli nomokati kovakwaneongalo ngaashi eteko leehombo, okulimenghulifa okuha ya kOngeleka mOshoondaxa, keengundumbibeli, oukolwe, oluhaelo, eshunomonima, dinokalunga, ondashipota, okulishudula, okudipa, okuvaka okulundila, okuhaluka, okuhatila ovakulunhu, okwaana oinima yongaho, oyo ei aishe oya etwa komunhu mwene.

Ndele efina linene olo okuhashiiva Kalunga, ouhe na Kalunga, oupaani.

Tu taleni nawa uta: Oukehenakushiiva Kalunga kashili. Odjovo yomulumenhu ou Karl Me-nninger otai ningi yoshili.

"Ounyuni owa shitwa po omolwovanhu, ndele ovanhu vounyuni, eshi ove shi dimbwa. Eshi osho oshidjuu okwiitavelwa, ngaashi fye vene. Ovanhu vamwe ova dalwa kovalkadi, va tekulwa kovadali, va lelwa kovakulunhu, ova fudikwa kovanhu novafila ve na enangekonoupuna lOngeleka nomahodi oonakufiwapo.

Osho oshipu okupopya efikilo nefimbo lokomesho shi dulife okutala efikilo letu unene mefimbo la pita notali ya tali endebele." (Paul E. Johnson, Psychology of Pastoral care) Openi tu li hano nomido edi 1970?

Otu li kedu la kulupa la kuluputuka. Ngenge hatu lesa momambo ovanongo, ohatu hange taku tiwa edu pokudalwa kwaJesus ola kala ko eedula di fike lwopamayuvi atano (5,000). Manga paife di fike lwopamayuvi atano na limwe. Oshinima ngenge oshi dule nge oshikulunhu, ngenge oshi dule tate meme, osha kulupa, ngenge oshi dule meekulu natatekulu osha kuluputuka, ngenge oshi dule nee oshiwana shetu kashi shii vali okutongwa. Kedu oko tu li ko ohatu li hongo ko oinima ei.

1. Edu ola shitwa omolwomunhu, Gen.1:26.
2. Omunhu okwa shitwa a lungama e shi kulonga nokulongela Kalunga.
3. Omunhu okwa pilamena Kalunga tashi ti: Oku na okuhenakushiivakalunga. Ei oyo oshili omo oiwana aisheishe ya pita mo, oyo i li koshi yetango eli.

Noshiwana shOvaisrael okwa li omafimbo omo inashi shiiva Kalunga nande. Itandi popi eliteekokalunga, ndele ohandi popi efyuululo lokupilamena Kalunga lopeshito Gen.3:8,23. Kalunga okwa tameka naAbraham nakuhena-kalunga, okwa xulile muNahor. Paife oshilonga shinene osho okupilamununa ovanhu va taalele kuKalunga, nosho eudifo laJesus lote-te (Mark.1:15).

Paife otu li kedu tali tondoka, edu lovatumwa, oidumi yomaludi mahapu, oituki ya yuka mevalelwa, oitopi ikumwifa. Okedu tuu la shiti-lwa omunhu oku.. Edu eshi tali kulupa keshe fiku ngaha, novanhu inava pwa okutaalelifwa kuKalunga, otashi ningwa ngahelipi nee?

(Ota ku twikilwa)

Rev. Paulus Heita

NKENE EPANGELO LYOPAKATHIMBO TALI KA KALA

Omuprofesora mooveta, Marinus Wiechers, ngoka e li omugandjimayele gwAadamara momutumba gwonakuyiwa yaSuidwes, okwa yamukula nkene epangelo lyopakathimbo tali ka kala muSuidwes.

Kepulo kutya epangelo ndyoka lyopakathimbo otali ya po ngiini, okwa ti kutya epangelo ndyoka otali kala tali endeke ko kashona nakashona naanaa pauthemba mboka wu niwe kuSuidwes.

Okukala po kwepangelo lyopakathimbo oshinima tashi kala miikaha yaSuid-Afrika sigo Suidwes a mono emanguluko lyuudha.

Pethimbo ndika oveta kehe tayi ningwa nenge tayi kolekwa, Suid-Afrika oye ta gandja etokolo lyahugunina osho wo kundjoka tayi kuthwa po.

Epangelo lyiilumbu otali ka kala noonkondo naanaa ngaashi lya kala shito. Omapangelo wo ngoka ge li kuumbangalantu waSuidwes (omavigumbo), otaga ka kala noonkondo dha-gu.

Epangelo lyopakathimbo otali uthwa komutumba (beraad). Otapu ka kala oshikondo oshipitithi noshigandjiveta.

Suid-Afrika papangelo ndika oye ta kala niikandjo yiinima mbika: egameno, iinima yopondje, iinima yomeni yuwanawa woshilongo, iimaliwa, iikwapoosa nomakwatakanitho noshwo wo iiyenditho niinima yopaveta.

Suidwes ota kala owala e na sha nuunampya, eliko, omalanditho, uukalinawa niikwa-wo ya hupu ko.

Suidwes ota ka manguluka ngaashi Transkei. Opalamenta yaKaapa oyo tayi pitika oveta ndjoka Suidwes e na okulongitha pakathimbo, osho wo oveta ndjoka tayi fala memanguluko lyolela.

Ehogololo otali ka ningwa konima lela yemanguluko.

Okwa ti wo kutya Swapo ota vulu okuya moonkundathana, oshoka ongundu yopolotika ya ziminwa. Okukala po kwe otaku ka enditha iinima nawa.

(Rapport 22.8.76)

SUZMAN A TUMBALEKWA

Omukulukadhi Helena Suzman, oshilyo shopalamente ya S. A. nomuwiliki gwopaati, "Progressive Party, okwa pewa esimaneko lyonkatu yuundohotola mooveta, mosikola yombanda yaWitwatersland.

Osikola ndjika oya ti, kutya efolo Suzman okwa tseyika apehe meni nopondje mujuyuni omolwonkambadhala ye aluhe okukutha po okayoya mu S. A. hoka ki ikwatelela ashike kolwaala nokoludhi.

Efelo okwa kala wo omukondjithi gwooveta ndhoka tadhi thiminike onkalo yopaudemokoli moshilongo.

(Advertiser 27/8/1976)

AANAMIMBIA YA EGULULILWA OSIKOLA

Omupresidende Kenneth Kaunda, okwa egulula omasiku ngaka etungo lyosikola yaAanamibia. Esiku lyeegululo, oyo wo lya li esiku lyaNamibia tali dhimbulukwa ekondjo lyoomvula omulongo, ehanganano lyaSWAPO sho lya tameke okukondjitha Suid-Afrika.

Etungo lya tungithwa muZambia kooranda oomiliyona 14, olya dhiladhililwa okuputudha Aanamibia mboka ye li pondje, miinima yoshilongo shawo uuna tali manguluka.

Omukuluntusikola gwasikola ndjoka omusamane Hage Geingob (35) oye ngoka a li omukalelipo gwa SWAPO kligwanahanganano.

OMATILIKA OTAGA TALWA NAWA

Epangelo oli li po ngashingeyi li ipyakidhila nokutala nawa opo andola ekonakono lyOmatilika li kuthwe po. Osho oministeli yElongo, yOmaudhano nOmainyanyudho dr. Piet Koorhof a ti moVenduka.

Oministeli otayi dhiladhila kutya Omatilika hasho naanaa we oshinima shahugunina okukonakona omagano (oshitalenti) gomunona. Ihe osha li ngaaka nale.

Omatilika ngoka ge li po ekonakono lyaayehe pwaa na ondjooolola, oga pumbwa eopalekululo.

"Ngashingeyi opwitulwa mo okukonakona Omatilika, opo ngele tashi vulika ga ekelwehi, popu talike omukalo gumwe gwokukonakona aalongwa".

Omusamane Koorhof, okwa popi oshindji sha simana kombinga yelongo. Okwa ti wo kutya omusindalongo gwomatematika, uudhindoli (chemistry) noBiologi otayi ka ningwa iipu, okuza 1977, opo ku shonopekwe uwindji womisindalongo. Aalongwa opo wo ya pande iilongwa mbika, ko ku kuthwe po ompumbwe ndjoka yi li po moshigwana yaamboka ya tseyana nawa iilongwa mbika.

IILUMBU OTAYI KA KALA MOMBILI

"Ya lombwelwa kutya omusamane Sam Nyoma ngoka e li omuwiliki gwehangano lye-tu ngele twa mono emanguluko ita ka gandja elombwelo opo iilumbu yi dhipagwe," osho omusamane Ben-T. Gurirab omukalelipo gwo Swapo kligwanahanganano a lombwele omunankundana.

Okwa ti wo kutya iilumbu mbyoka yi itala kutya aantu yomevi muka nayi tameke okukondjela Suidwes.

Omusamane Gurirab okwa holola nkene Swapo ta popilwa kaakalimo yaSuidwes ye thike 522 430 (70%) yomaantu 746 328.

(Advertiser)

Omuntu naKalunga

Dha za kep. 3

"Ehupitho lyomuntu kali li pondje yOngeleka, ihe oli li meni lyOngeleka, osho omumbisofi gwonale Cyprianus u uvu ko Ongeleka ngaa-ka.

Mokuuvitha kwongeleka, Kalunga ota rano ompito okulundulula omuntu omulunde a kale shili oshifetha she. Mehungomwenyo ongeleka otayi kwatha omuntu a longithwa iipwe kuuwinayi womuye a manguluke keiuvo ewinayi muye, opo a shune monkalo yi na elago pokati ke naKalunga nopokati ke naantu ooyakwawo.

Muudiakoni ongeleka otayi hololele omuntu moku mu yakula kutya Kalunga okuhole nolutu lwe wo. Meyakulo ongeleka otayi holola kutya maana yaKalunga kombanda yevi otamu pangelwa kohole, elongelokumwe nuuwayinathana washili.

Ngele tandi popi palaka lyopapangelo, Ongeleka oyo ongundu tayi longo moshikondo shohole yaKalunga. Omukriste kehe ndhindhili-ka kutya manga u li oshilyo mongeleka ya-Kristus, ou li po gwomoshikondo shohole yaKalunga. U pitithe ohole muuyuni.

Mehistoli lyopolotika kape na epangelo lya dhikile oshikondo shohole, shila oshikondo shuuyuuki. Aantu otwa ndhindhilike wo kutya moshikondo shuuyuuki ohashi vulika mu longithwe ooveta kaadhi na ohole.

Ongeleka ohole, nohole ongeleka.

Rev. Elia Niinkoti

TOOLITHA NDJE KWEE?

Omusamane Levi Simeon gwokUyoka, Onayena, ota indile ngele ope na ngoka a mona okampunda ke hoka e ka kuthwa moshihauto ombaadhilila pOluno (16.8.76).

Mokampunda omwa li omwaalu gwiimali-wa ogwindji osho wo oombapila dha si-mana.

Omulihongi we-tu muAmerika, Immanuel Hafe-ni Hatutale. O-kwa yandja o-makundo maha-pu koshiwana, omo a kumaida oshiwana shi kale neyomba-mo.



Omuwiliki woshilonga shahamunona hamukulunhu mOngeleka, Aune Shilongo, ou e li natango muSoomi te li xumifa komesho mefiloshisho louteku wopakriste. Omulongi Aune okwa wilika ovanya-sha mongeleka ei efimbo lile.

OMUKWETU

Oye oshifo shOngeleka onkwaevangeli paLuther yomOwambokavango. Ohashi nyanyangidhwa mOniipa. Omukuluntu gwoshifo omumbisofi dr. Leonard Auála. Amushanga Rev. Sebulon Ekandjo.

Ondando yoshifo komumvo muSuidwes nomuAfrika alihe R 2.00, kombanda yomafuta R 4.00.

Oondando nomambesitelo naga tumwe kOmukwetu Oniipa: P/B. 2013, Ondangwa.

Omatseyitho agehe gomuntu mwene ohaga futilwa kumwene.

OWAMBOKAVANGO CHURCH PRESS
PRIVATE BAG 2013, ONDANGWA 9270